

四庫全書

集部

欽定四庫全書

集部
滄溟集卷二

詳校官庶吉士_臣柳邁祖

中書_臣劉源溥覆勘

覆校官中書_臣朱 鈐

校對官庶吉士_臣嚴 福

謄錄監生_臣劉文耀

欽定四庫全書

集部六

滄溟集目錄

別集類五

明

卷一

古樂府

卷二

古樂府

附三言四言

卷三

五言古詩

卷四

五言古詩

卷五

七言古詩

卷六

五言律詩

卷七

五言律詩 七言律詩

卷八

七言律詩

卷九

七言律詩

卷十

七言律詩

卷十一

七言律詩
五言排律

卷十二

七言排律
七言絕句

卷十三

七言絕句

卷十四

七言絕句

卷十五

賦
頌
序

卷十六

序

卷十七

序

卷十八

序

卷十九

記

卷二十

傳

卷二十一

墓誌

卷二十二

墓誌

卷二十三

墓誌
墓表
神道碑
行狀
祭文

卷二十四

祭文

卷二十五

雜文

卷二十六

書

卷二十七

書

卷二十八

書

卷二十九

書

卷三十

書 附錄

臣等謹案滄溟集三十卷附錄一卷明李攀龍撰攀龍字子鱗歷城人嘉靖甲辰進士官

至河南按察使是集凡詩十四卷文十六卷
附錄志傳表誄之文一卷明代文章初以春
容典雅為宗久之漸流為庸熟正德間李夢
陽崛起北地倡為復古之學戒天下無讀唐
以後書風氣為之一變攀龍引其緒而暢闡
之殷士儋誌其墓稱文自西漢以下詩自天
寶以下若為其毫素污者輒不忍為故所作
一字一句摹擬古人與太倉王士貞遞相倡

和傾動一世舉以為班馬李杜復生于明至
萬厯間公安袁宏道兄弟始以贗古詆之天
啓中臨川艾南英排之尤力今觀其集古樂
府割剥字句誠不免剽竊之譏諸體亦亮節
較多微情差少襟文多詰屈其詞塗飾其字
誠不免如諸家所譏然攀龍資地本高記誦
亦博其才力富健凌轢一時亦有不可磨滅
者汰其膚廓擷其英華固亦豪傑之士譽者

過情毀者亦或太甚也乾隆四十一年十月

恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

滄溟集卷一

明 李攀龍 撰

古樂府

胡寬營新豐士女老幼相攜路首各知其室放
大羊雞鷺于通塗亦競識其家此善用其擬者
也至伯樂論天下之馬則若滅若沒若亡若失
觀天機也得其精而忘其麤在其內而忘其外
色物牝牡一弗敢知斯又當其無有擬之用矣

古之為樂府者無慮數百家各與之爭片語之間使雖復起各厭其意是故必有以當其無有擬之用有以當其無有擬之用則雖奇而有所不用也易曰擬議以成其變化日新之謂盛德不可與言詩乎哉

黃澤辭

皇之麋其馬八驪
皇人委蛇
皇之水其馬騄耳
皇人受祉

皇之曲洛其馬沃若皇人薄薄

皇人孽孽其馬噴雪我心如結

白雲謠

白雲在天山陵逶迤率彼東土諸夏間之將子能來

瑶池謠

白雲在山亦洽而野予歸三年將顧見女

南山歌

南山白石白離離爾牛之角何其悲車下短衣歌者誰

國有叔牙當見知佐命伯王獨後來

越人歌

山有隈兮江有汜歌擁枻兮見王子揄修袂兮披長雲
舉繡被兮風紛紛蒙詬恥兮心靡宅君不知兮可奈何

采芣婦歌

卧下之薪何綢繆欲寐不寐思冠讐我今采芣以遨遊

易水歌

繚天兮白虹蕭蕭兮北風壯士怒兮易水飛羽聲激兮

雲不歸

垓下歌

從美人擁駿馬涕從橫兮垓之下

大風歌

大風沸兮雲薄天驅萬乘兮紛來旋紛來旋兮沛之宮
士桓桓兮福攸同

秋風辭

秋風蕭蕭兮白雲晶晶草木黃落兮鴻雁于征蘭可佩

芳菊可餐遺佳人芳汾之干挾飛龍
芳下中流橫大波
芳放遠遊靈偃蹇芳翳日來憺容與
芳紛裴徊顧帝京
芳何壯哉

天馬歌

天馬下閭闔開汗以血駢離哉河之精
龍之子視浮雲
無萬里絕流景躡遺風今安駕幸回中
天馬來從西極
經千里歸有德天馬來竦予身挾飛電
化若神天馬來
循東道承靈威服帝皂天馬來歲執徐
陜四海將安如

天馬徠出嶠山逝昆侖排玉闕天馬徠龍為友北擊胡
驅羣醜

李夫人歌

去邪來邪就而視之紛何被被其徘徊

寤邪夢邪就而視之色紅顏其弗明

步儼儼者誰邪就而視之風何蕭蕭其蔽帷

隴上歌

隴上壯士乘驕驄帶桑韉服挾秦弓七尺大刀搏白虹

丈八蛇矛盤怒風戰始三交失大刀且盪且走亡其曹
棄我驪駝巖中逃為我謂烏為客豪隴上之水流潺潺
壯士一去不復還

蹕林歌

單于庭陰山下漢家和親刑白馬刑白馬祭龍城今年
蹕林大會兵

銑歌 十八首

朱鷺

朱鷺獵其纓茄下行魚在梁縱復橫鶻何飛濡其羽上
書諫其主

思悲翁

思悲翁鳳凰安宿阿閣中奪我美人思悲翁鳳凰飛上
天梟子拉沓隨轉蓬狗逐狡兔走取爾梟子食梟母

艾如張

艾而張羅羅若雲中有黃雀呼其羣毛羽摧頽離哉紛
山出黃雀山嵯峨鴻鵠絕四海君亦難為羅我欲從之

讒言多鴻鵠徘徊奈雀何

上之回

上之回蕭關開以待邊單于臺勒兵十八萬羽林材振
大旅鬚長馳驚肉奴臣月支朝諸侯王甘泉宮郡國受
計福來同

翁離

擁離趾中可築宮蘭用葺之艾爾蓬擁離趾中

戰城南

戰城南走城北轉闔不利號路側謂我梟騎且行出攻
寧為野鳥食不逐鴛馬徘徊蒲葦中水深黝黝蒲葦驚
鷺鳥亦自不去客亦自不豪梁以集鳥子五鳥母六禾
黍不食攫腐肉願為忠臣何可覆傷子良臣良臣誠可
傷遠道之人枯骨何葬

巫山高

巫山高自言高江水深自言深勿復相思君有他心山
以蔚蔚水以湯湯何用度之石用梁徘徊遠望泣下霑

裳願託黃鵠東歸故鄉

上陵

上陵亦誠羨下津以尚羊問客從何來自言水中央
芙蓉為君衣芙蓉為君裳木蘭為君佩江離間杜蘅銅池
之芝以九莖光華燭天披金英鳳凰之集乍開乍合蜚
覽上林曾不知日月明赤翅之鴻翁雜相隨白雁何蔚
蔚雲為車風為馬游閭闔守謁者五色露何泥泥乃在
仙人金掌中凝如膏美如飴願奉我主飲延年萬歲期

將進酒

將進酒稱我觴紛佳哉以浩倡心所作未嘗聞徘徊三
歎一為君君之臣明四時和國有良工悉索歌觀者不
苦奈子何

君馬黃

君馬黃臣馬驪二馬異體同權奇徘徊四海美人子二
馬相得以千里故東非我東西非我西南非我南北非
我北駕如六飛龍之翼路訾邪謂何覽遨遊安終極二

馬視駕馬局促食轅下將以問馭者

芳樹

芳樹如此之蔚蔚上有黃鵠以翱翔下飲蘭池鳴鏘鏘
二而為侶三而為行芳樹拉雜黃鵠傷秋風蕭蕭思其
鄉妬人之子妬殺我君有宅心無不可黃鵠高飛亦有
羅目欲顧之奈樂何

有所思

有所思乃在燕山隅何用問遺君大秦明月珠結以連

理帶薦以合歡襦又何問遺君青絲係玉環可直千萬
餘翠羽紹繚之黃金錯其間聞君有它心拉雜其珠摧
其環推其環臨高臺反袂以障之當風揚其灰從今以
往勿復相思若復相思有如此珠有如此環非我可為
雞鳴狗吠我視兄嫂不言謂何東方須臾高奈何

雉子

雉子斑如此之趨蹌蹌雄來蜚從雌拉沓曳水集于梁
目以顧之蔚蔚冥冥艾而張羅雉子知得奈我何王孫

有羅以雉子黃鵠之羅當千里駕以南駕以北朝行出
遨遊暮從美人食

聖人出

聖人出應燁怒赫炎精文教洽武功成寒暑德河海清
駕六龍何駢離聖人哉聖人御天以調之日月星辰和
四時郡國吏功上所治君之臣明遠如期

上邪

上邪我欲與君同心樂以不可禁相思紹繚諛言罔極

大駕六龍處天側日月出入滄海中
妬人之子難為工
臨高臺

臨高臺望江水江水之流以千里
黃鵠知得高蜚止願
遺香草羨人子關弓問鵠從何來
我主萬年亦誠哉禾
黍不獲鵠何食遨遊四海安終極

遠如期

遠如期宜四海皇帝日月所置有甘露
三載單于自歸
大佳以萬人稽首陛下北藩臣左右
賢王奉國珍謁者

令引之鄉殿陳素佗拉沓就羽蒙戎酪酒乃是關氏之
所飲馱駢生自余吾中將進酒顧其豪撓以留犁徑路
刀何用賜之黃金犀毗赤綈錦袍扶伏沮澤曾不知天
子神靈從今以往但居光祿塞下不願歸庭

石流

石流津以梁無敢曳水君安所薄秋風湯湯東飛者鵠
北遊者河中有冥冥之白沙遠道之人謂之何蘭以有
香君不知願言懷之遺所思

五鳳曲

梧桐生高岡鳳凰鳴中央三百六十鳥翁雜朝四方其
東鳴青鵠其西鳴鸛鸛鸞鸞鳴其陰鶉雀鳴其旁

精列

欲何為雖有一介志慷慨非其時慷慨非其時言從吾
所好混迹于鴟夷入宮無美女名士常見持名士常見
持卞和乃衛足白璧以終疑白璧以終疑還君十五城
抱之寧自竒抱之寧自竒周孔聖殂落世人莫我知雖

有一介志慷慨非其時

東光

胡兒平倭奴何不平倭奴利水戰海塹船為城諸軍鼓
騎士馳射難縱橫

對酒

對酒歌陽春含意未能申請客聽其真男兒居世無依
因誠獨難自絕于要津視扶風稱三輔吏共理之臣奉
職亦何狀盤桓磬折闕石和鈞為積書以報諸天官自

公卿大夫士咸領其人以君子經綸是時賤玉而貴珉
獨蹶迫落非其倫素無跣跣之才四載不遷敢辭於
積薪此道當何以具陳彷徨所欲歸潔其身

鳥生

黃口四五雀羅坐秦氏桂樹間啄啄樹上蠹母子相哺
自言安喈我三河不知為誰家有輕薄少年臂坐一鷄
子鷄子小小如人拳出入雀東西一縱即中兩黃口毛
羽摧頽魂魄飛上滄浪天鷄子下來還少年阿母生黃

口時乃在高堂構櫺間
惜我人民安知雀乳處
窈窕紫深宮中安從通
白兔乃在平原大澤中
羅者尚復得脯腊之惜
我猛虎斑斑南山間
射工尚復得枕藉之明珠
乃在合浦深淵中
後宮尚得剖以綴其襦
惜我人民生各有壽命
何須尚復計會賢愚

平陵東 二首

太山陽璆琳琅有美一人
坐明堂坐明堂以王者德大
從羣臣朝萬國朝萬國如會
同願見白雲生封中生封

中禪梁父今上皇帝聖神主

其二

陰山旁馬牛羊不知何人城朔方城朔方絕大荒虜兩
關氏一賢王一賢王戰失利虎頭將軍顧驃騎顧驃騎
曰歸止單于敢望漢天子

陌上桑

日出東南隅照我西北樓樓上有好女自名秦羅敷羅
敷貴家子足不踰門樞性頗喜蠶作采桑南陌頭上枝

結籠係下枝挂籠鉤墮髻何繚繞顏色以敷愉綳綺為
下裙紫綺為上襦行者見羅敷下擔故綢繆少年見羅
敷袒褐出臂韝樵者忘其薪畧者忘其畧來歸但怨怒
且復坐斯須鮮使君自南來駐我五馬車遣吏前致問
為是誰家姝羅敷小家女秦氏有高樓西隣焦仲卿蘭
芝對道隅羅敷年幾何十五為人婦嫁復一年餘力桑
以作苦孰與使君俱使君復為誰蠶桑所自娛小吏無
所畏使君一何迂羅敷他人婦使君他人夫

二東方千解

餘騎夫壻在上頭左右三河長負弩為先驅何用識夫
壻飛蓋隨高車象牙為車軫桂樹為輪輿白馬為上襄
兩驂皆驪駒青絲為馬勒黃金為轡頭腰中千金劍自
名為鹿盧起家府小吏拜為朝大夫稍遷郡太守出入
專城居月朔朝京師觀者盈路衢為人既白皙鬢鬢有
髭鬚四十尚不足三十尚有餘坐中數千人皆言夫壻
殊

王明君吟

我本良家子承恩入漢宮
光彩射綺羅語笑生春風
君王希召幸在遠誰為通
漢宮三十六處處種梧桐
美女八千名各各分當熊
黃金買顏色丹青多益工
寧知佳麗人不出所圖中
黃金猶糞土丹青復何功
顏色非可恃粉黛故難同
因念長門賦夙昔亦相蒙
君王寵自娛賤妾以和戎
豈惜賤妾去但惜長門空
涕泣顧長門從此逐秋蓬

安期生

安期生參駕白鹿雲中行參駕白鹿雲中行下遊來安
期生白鹿皎皎金為羈玉為纓顧見蓬萊三山十二城
安期生自署其名過謁四海五嶽後從麒麟赤鳳迎禹
湯文武不足令令我今上應太平擁護左右賢公卿稽
首聖人大道成仙女羅坐吹笛笙天神八面侍衛明流
鳥銜符翔殿廷悲吟我主享萬年皇帝求一得命延

長歌行 三首

嗟我谷中蘭猗猗復英英秋氣日夜至鵲鳩乃先鳴百

草不重芳霜露浩縱橫栖就一役慷慨非其情少壯
復何為老大無成名

其二

仙人攬紫芝芳燦如芙蓉兩耳委其肩短髮以蒙茸侍
從幾玉女導我入雲中奉我一丸藥期我于空同服之
生羽翼倬約變形容願見雲中鹿婉婉成白龍

其三

纍纍城上星河漢流清光耿耿不能寐寤言起彷徨

惶立中庭遼遼夜未央白雲塗我衣北風吹我裳還坐
顧四壁蘭燈一何明緘書寄遠道涕泣下縱橫倦鳥無
故林遊子無故鄉驅車出門去徒侶相扶將

短歌行

駟馬可縻去日難追清酒載觴短歌苦悲遼當以遊何
能坐愁全身遺名唯有莊周鳳凰于飛覽彼九圍但為
君故駕言旋歸杜門似鄙離俗似驕彷徨所欲此一何
勞斑斑猛虎其尾可履鬱鬱壯心猝不可抵傾側勢利

還自相戕覆車不戒躊躇雁行秋風駢駢轉蓬如輪漂
揚四野莫知所臻鳥不厭高魚不厭深爾其肆志載浮
載沉

當鰕鮒行

日月揚光華雲漢垂文章五嶽高摩天江海百谷王周
孔聖有作大雅豈淪亡曲士徒嗷嗷此道非所詳嗟予
滯末位慷慨志四方左伏吳越波右以笞中行立髮而
帟視厲馬撫干將吾謀適不用駕言歸故鄉

董逃行

吾欲上謁從蓬萊遨遊三山戲九垓閭闔誅蕩開斑璘
宮闕樓臺流光倒景徘徊但見織女弄杼往來白榆壘
纍支機十二枚河流逶迤但見丈夫牽牛飲其隈問爾
凡吏所為客謝主人樂哉教敕酌彼金罍織女長跪進
酒牽牛陪桂樹一何摧顏嫦娥端坐頷其頤白兔抱杵
戛樹蝦蟇栽采取甘露一玉杯服此露壽以崔嵬服此
甘露顏色自好陛下長生不老坐享萬年有道君臣歡

如魚藻陛下長與天相保

塘上行

塘上雙鴛鴦芙蓉翳其陰不自行仁義何能知妾心青
蠅一墮耳琴瑟難為音新人入宮時意已無同衾君子
在萬里顏色安可任念妾平生時豈謂有中路新人斷
流黃故人斷紈素新人種蘭若故人種桂樹新人操陽
春故人操白露新人日以驩故人日以悲浮雲顧我庭
北風動我惟恩愛儻中還皓首以為期

秋胡行 四首

太行易驅仕路難為工
太行易驅仕路難為工
諛佞喪志罄折不喪自負者
忌自異者攻智力相御
莫知所終歌以言之仕
路難為工

其二

河清可須鍾期未易逢
河清可須鍾期未易逢
國士見知非以先容雖有
骨肉中懷莫從伯牙絕
絃甘此不恭歌以言之
鍾期未易逢

其三

閤妬相成周客一何疎
閤妬相成周客一何疎
維彼燕石明月是居爰發
深藏庶用見譽即曰
瓦甕孰抹其初歌以
言之周客一何疎

其四

好惡何常顯者易為名
好惡何常顯者易為名
一犬吠形百犬吠聲如
草偃風夜蟲附明西
子雖姣不屬于盲歌
以言之顯者易為名

相逢行

相逢狹斜間，狹斜不容車。不知何年少，夾轂問君家。君家誠易知，甲第城南隅。黃金為君堂，白玉為門樞。坐客高堂上，擊鐘吹笙竽。將軍起行酒，何論馮子都。兄弟兩三人，出入長相須。大子侍中郎，中子中大夫。小子復何官，稍遷執金吾。五日一來歸，觀者羅長衢。二弟為雁行，長兄上頭居。東方千餘騎，兄弟一何殊。入門遊後園，銀牀纏轆轤。梧桐十二樹，一鳳將九雛。梧桐自相值，鳳凰

自相呼音聲何啾啾枝葉以扶疎大婦董妖嬈中婦秦
羅敷小婦邯鄲女顏色世所無大人且安坐為樂良未
徂

燕歌行 二首

秋風蕭瑟吹我裳蟋蟀寥寥啼我牀出門四顧非故鄉
誰能客遊不斷腸短歌微吟激繁霜浮雲千里一彷徨
仰看明月流清光二十八宿羅成行高臺非閣遙相望
河漢縱橫難為梁胡馬北鳴雁南翔憂來不知從何方

慙慙伏枕聊自當涕從中零安得防豈不懷歸道阻長
其二

會日苦少別日多為君盛年行蹉跎憂來援琴聊短歌
羽聲慷慨調不和悲風四起揚塵沙浮雲摧顏互相加
人生奄忽若春華誰家客遊常無家中曲不覺淚滂沱
攬衣出戶夜如何衆星歷歷月低河鴻雁嗷嗷鳴相過
欲往從之畏蔚羅

善哉行 二首

來日難期少合多離今日相樂不醉何為寥寥北堂哀
竹苦絲短歌裂耳慷慨以悲白日云沒秉燭繼之何晝
何夜迨我盛時烹肥擊鮮斗酒自隨安知王喬八公者
誰促坐行觴交屬所私百年如寄當復何疑慊慊惜費
智者所嗤計會有無將以奚遺

其二

巢父潔身天下為汙四岳九官而無匹夫傳說築巖維
時商賈爰立作相不俟終日尚避海濱二老是麗既載

後車三聖所師仲未伯齊三逐何鄙生有父母知有鮑
子伯陽猶龍和光同塵芻狗萬物聖而不仁丘明修辭
古之國工縱橫六經化裁與同干木偃息大魏以藩式
則閉門迫則踰垣莊周非人蓬累而行逍遙弄世乃稱
達生

西門行

出西門步踟躕相逢不作樂當復何須但作樂勿復問
有無安知家人生產當復溷吾徒君擊筑我和歌請為

燕市飲旁人當奈何人生欲知已結交不在多豈無車
馬客富貴相經過自非名卿鮑叔牙雖有國士誰當知
自非名卿鮑叔牙雖有國士誰當知與君重自愛中道
有別離區區抱苦心可用不相疑

東門行

二首

出東門顧且望欲何歸向洛陽座下兩走馬馬上結束
千金裝揮鞭酒家去調笑邯鄲倡作使博徒數輩擲錢
百萬少年場少年場朝用廣平公故暮為瑯琊大王男

兒結交願得豪賢君復自愛莫相忘男兒結交願得豪
賢君復自愛莫相忘恩仇分所當翩翩輕薄殊未央

其二

出東門不顧歸來入門愴欲悲舍中無儋石儲還視身
上衣參差慷慨出門去兒女牽裾啼他家自願富貴賤
妾與君但鋪糜但鋪糜上用穹窿天故下用匍匐小兒
時吏清廉法不可干一旦緩急當告誰行吾望君歸嗟
少年莫輕非

飲馬長城窟行

蕭蕭山上草悠悠山下道長城一何長遠望多悲傷遠
望不如歸游子日依依依依復累累涕泣當為誰高臺
知天風鴻雁知天霜欲媚更無人欲去更彷徨浮雲西
北來我馬顧之鳴願附尺素書迢迢東南行浮雲不可
託素書不可成十年違室家安知即平生

上留田行

人生一何相懸哲士常見未然愚夫不睹目前所較以

千年今爾忽怨蒼天非世淆亂誰貴聖賢

孤兒行

孤兒生孤兒生命不如一杯土父母在時坐長筵雷大鼓
父母已去兄嫂令我報府今年護羌明年擊胡虜六月
來歸不得自言苦目汁稠濁頭面生瘡大兄言視飯
大嫂言既釜上高堂不見父與母下堂孤兒淚下如縷
使我朝行薪暮不得束芻頃筐敝漏緝之用茶鉤折無
喙鏃鈍無膚舍鏃拔叢棘棘斷行復甦刺傷我手復裂

我孺自念猶人誰使為奴兄嫂如此為不早去下從地
下當復何須高秋八九月墮巖霜百草凋枯牧豎絕糧
驅羊下山逸入他羣不辨所亡願取我羔莫攘我羊羊
復戀子華之不將棄華挽角羊僵道傍拽羊回家兄與
嫂睨三年不乳毛尾空長作何校計亂曰羊鳴一何羊
羊父母地下將書寄與兄嫂爾愛其羊我愛其子

怨詩行

荆山何巖巖白壁何齒齒圭璋滿朝廷爾胡獨在此千

載抵塵沙一抱即知己瓦礫生目中衆人紛所指五都
當一顧三獻不得理一刖藏白虹再刖涸沂水玉石苟
不分安用存吾趾昭王遣使問慷慨不可止一剖屬白
虹再剖折沂水至今為宗器天下稱其美願以陵陽侯
還之樂正子

白頭

青如雪中栢鑿如水中石自君有兩意事事非疇昔疇
昔共綢繆何嘗不膠漆今日不膠漆明日即參商東西

大道上車馬遙相望新人此一時故人彼一時難將故
人意持與新人知非不結同心人情中道還白頭百年
期豈作斗酒間雲漢何繩繩星宿何累累急氣一以失
黃金不可為決如潰防川絕如蹶張弦有親相推與無
親私自憐

滄溟集卷一

欽定四庫全書

滄溟集卷二

明 李攀龍 撰

古樂府

艷歌何嘗行

何嘗快獨平生但當被華縠獵長纓起家為二千石四十以專城兄弟縱橫要路車馬絡繹往來公卿顯者行但當在高堂置酒快獨呼我所歡五陵少年任俠知名主人稱壽以樂上賓攬持綺麗雜坐彈箏觸抵安足諍

歲月忽如流願言重自愛吾夙昔與君共綢繆朝亦復
苦愁暮亦復苦愁辟彼東逝之川汎汎不繫之舟浮雲
轉薄心悠悠有似客遊難久留

艷歌行

三首

皎皎月中兔羅網安得錯夫婿流宕子翩翩長道路上
堂事舅姑下堂力蠶作日出行采桑春風動紈素不知
何年少踟躕西北顧請君且莫顧黃金徒自誤黃金道
路傍誰當見國卿

其二

童童河上柳朝榮暮來朽人生天地間何可日無酒偃
蹇誰當聞忼慷誰當有賴得心所歡嚼我以大斗醉後
唱高言掩耳使一走語卿且勿走不如舌在口舌在難
為捫歎爾欲行恩

其三

南海一何長明珠一何光大珠抵明月小珠燭中堂洛
陽發中使明珠竊自傷沒海采是珠珠淚以從橫持作

木蘭櫃送至洛陽宮後宮莫不歎問珠從何方誰能復
市此隋侯與孟嘗用玉紹繚之黃金錯其中綴之用翡
翠薰用蘇合香本自南海珠今為後宮璫

滿歌行

得意良獨難大帶如河高弁如山功名侮予心不遑安
遙望故鄉鬱鬱漫漫憂來自中不遜于顏鄒士患得失
達士多所宜智不闕時我斯蕩蕩天下熙熙俛拾仰取
日競刀錐逝將掉臂棄而違之東蹈滄海寧居九夷嶮

巖可為念為偃息乃在草萊蹲而踰垣嗒焉鑿坏流俗
落落豈無友生門一以杜其可復開蜉蝣之裳視此未
榮寵辱者驚寓言憤世混迹躬耕貧賤肆志惰傲相成
徘徊千古載濁載清飲酒而已誰知其它即有三公相
去幾何百年如寄孰少孰多胡朝謀夕自貽蹉跎屹彼
在位經營四方天道病愚人道趨彊退而為樂遼遼未
央

企喻歌

四首

男兒自言彊出門思故鄉隴水流離下淚落鐵襠
放馬大澤中馬飽勿復驅寧斷壯士肉不斷駿馬
鷄子下狡兔不顧黃雀羣男兒飽百戰少年笑殺人
男兒重意氣結伴不須錢誰能無兄弟千里不相憐

瑯琊王歌八首

陽春二三月單衫繡襦襠繫馬臨大道值女行采桑
炎天五六月挈枕逐陰涼絺服不掩體喚女汲寒漿
初寒八九月銀燭照高堂端然坐不睡看女織流黃

盛冬十一月調笑酒鑪傍玉壺出纖手索女弄絲簧
主人但置酒烹肥擊其鮮男兒好還鄉不願持一錢
孤兒當門泣門外霜皓皓今年許裁襦兄但視其嫂
駿馬似人長金鞭五尺強往來渭橋上瑯琊大道王
新買五尺刀摩挲不離手但來看此物軍中誰更有

鉅鹿公主歌

邯鄲女兒年十五能彈琵琶唱樂府
頭上明珠間翠羽客與酒錢笑不數

可憐誤嫁陽翟賈遂使黃金暗如土

紫騮馬歌

四首

出入渭城中少年獨妍雅不知是阿誰但識紫騮馬
紫馬從西來道逢一驪駒兩人下馬揖便入酒家胡
問客復何為昨日發東平袖中出短書心知自劉生
對客讀短書慷慨不能止拔劍出門去報讐燕市裏

黃淡思歌

二首

腸作輓轡轉淚作素綆垂獨坐不能言傍知思憶誰

胡馬代州出還騎出代州黃金裝馬勒青絲絡馬頭

地驅樂歌

蕭蕭條條風雨漂搖餓殺鷓鴣撐殺鴟鴞
倦鳥不飛非無羽翼貧女不嫁非無顏色
枕郎右臂郎側向左看郎顏色似不在我
宛轉郎懷坐郎左膝郎有它人不自今日

雀勞利歌

稂莠驕驕雀勞利前有鷄子後老鴟

與郎十期九不果郎有它人休誤我

捉搦歌 四首

仕宦還須論知己結交還須論君子男兒失意悔人指

老女不嫁難為理

東家女兒大狡獪屋裏燒香出牆外供養世尊作佛會

願得百媚無箇害

邯鄲城南夜逆旅樓頭十五誰家女可憐白馬空僵佇

不見其人但聞語

駿馬憑陵粟在口男兒精神錢在手何不結伴日沽酒
出臂蒼鷹使黃狗

折楊柳歌 五首

上馬折楊柳楊柳鬱葳蕤馬上吹長笛愁殺虜家兒
不惜折楊柳孟津楊柳西本是虜家女嫁作漢兒妻
放馬孟津岸飲馬孟津河雖是虜家兒愛聽漢兒歌
莫折楊柳枝婆娑動郎意自有珊瑚鞭出入擲郎臂
上馬出門去馬鞭持與郎郎度孟津水何時還故鄉

幽州馬客吟歌 五首

客從幽州來百萬為擄捕錢自它人有意氣良所無
今日但一擲何言無所持庭前兩走馬千里任君騎
自憐十指鑲玉壺不離手女兒行無賴故勸郎君酒
南山固言高上有北流泉女兒固言好須得郎自憐
郎齎千金裝結客行三秦那能論家計少年喜作人

慕容家自魯企由谷歌

鳥中有鷄子人中有慕容慕容家此谷少年多相從

高陽樂人歌 二首

欲知馬上兒但復看兒馬
結束殊輕薄不在漢兒下
郎來但坐飲百壺分自當見
郎行仁義無錢何所妨

團扇郎

白團扇明月入君懷
清光滿流盼霜雪散炎天
是儂歌始變合歡自一時
秋風歡不見

前溪歌 七首

逍遙東武亭下有獨桑路
歡但宿儂家前溪不可度

朝思出前溪暮思出前溪溪流亂漫下誰見倚門啼
女蘿著長松蔓與長松長雖非歲寒姿願得被風霜
黃葛生溪邊溪水東西流枝枝自纏繞葉葉自綢繆
春容故易老紅粉豈常鮮郎歸定何日憔悴復誰憐
亦異當年

誰能采黃葛逍遙獨桑頭黃葛斷還生春風不可留
爛漫使儂愁

葵藿自有心蘭蕙自有香黃瓜一小草春風獨不忘枝

葉頓芬芳

子夜歌 十首

涉江種芙蓉青荷幾時有但使蓮心生何慮不成偶
桑葉老欲盡春蠶已就眠那能不作繭絲子自纏綿
彊言共寢食十日九不俱桐花夜夜落梧子暗中踈
出亦陰憶汝入亦陰憶汝石闕四面生悲來定何許
蕩舟芙蓉池紅顏在池水儂與芙蓉花有何不相似
宿昔結同心絲髮與眉齊轉動如春風不離郎君懷

相憐須及時紅顏不難老郎自行由豫它人已相保
始欲識儂時白頭誓相憐一日三唐突持底解千年
歡心楊柳花春風為顛倒到頭有感化不離浮萍草
願因斗酒會發歡桃花容蹉跎自不飲雙杯持勸儂

四時子夜歌

八首

春鳥既集渚春花復著林高臺不可望春色蕩儂心
綺窓媚初月羅帳褰春風歡復自顧慮崎嶇當奈儂
三伏天雨火郎但籠窓坐何處汲寒漿金餅井中墮

婉伸華簟上不下歲蕤鑰郎君已自前羅衣那及著
庭含明月光蟋蟀入牀語獨自理寒衣秋風動砧杵
熒熒斜月輝累累清露垂中宵不還卧徘徊獨為誰
郎從何處來重袍那如水酒無沙糖味為他沃寒爾
北風振枯林嚴霜殺百草歡不與時競獨向相思老

懊惱歌 四首

五絲合歡被還得五絲縫儂為懊惱曲還持懊惱儂
布帆百餘幅婀娜自生風江水滿如月那得不愁儂

夙昔幽閨性冶遊持自惑旦夕三千里不復作顏色
長江得春風使帆如使馬朝發牛渚磯暮宿白門下

神絃歌

宿阿曲

天門詖蕩蕩地戶鬱沈沈真官下雲中窈窕從蘓林

道君曲

中庭有樹其實詡詡道君出入先以風雨

聖郎曲

梧桐何翼翼鳳凰何將將左坐青溪姑右坐白石郎姑
自翳瑤草郎自命椒漿

嬌女詩

二首

朝遊青溪南暮遊青溪北嬌女年十五芙蓉比顏色終
日奏絃歌小姑獨相識

徘徊白石江蹀躞赤山磯湘綺為下裳紫綺為上衣自
繡雙鴛鴦十十五五飛

白石郎曲

二首

郎之徠何紛員車以清風馬以雲前有明姑後道君
石子如彈丸累累江之渚有郎獨自居艷於十五女

青溪小姑曲

青溪湯湯白石為梁小姑不嫁誰謂無郎

湖就姑曲

北遊赤山湖遙望中芙蓉裁衣贈大姑

大姑舞白鳩仲姑淥水歌不共小姑愁

姑恩曲 二首

明姑遵雲中葳蕤六萌車前駕斑璘獸後從朱鳥麟辟邪

諸姑亦道同獨有明姑尊桂酒黃金色持以報姑恩

采蓮童曲

二首

扣櫂聲太苦聽我採蓮歌且將盛年容持比芙蓉花
西湖采蓮舟上有愁思婦不摘芙蓉花何因出素手

明下童曲

二首

走馬上越橋遺却黃金鞭遙望射堂頭徘徊驕不前

赭白千里姿斑駁八百餘乘不獨自去日與陸郎俱

同生曲 二首

盛時不再逢百歲一何促願以南山松秉作夜遊燭
蟋蟀空局促人命安可為但當飲美酒醉即蒿里歌

石城曲 四首

可憐冶遊郎大馬高纏駿冶遊石城下聞名少年中
珂戔同心髻環插三子釵種種隨時變懊惱郎君懷
陽春二三月花與郎同色明知苦淹留盛年不可得

大偏十八櫓長篙如竹林張帆看風色知是下江陵

烏夜啼

四首

石城諸少年歌舞日相新劉生安東平是郎得意人
長檣百幅帆常著千里風婀娜檣上佳飛逐不成雙
大帆曳雲還長檣柱天起非是不相留勢已無千里
烏生秦氏家不從秦氏栖夜夜將九子石城城上啼

烏棲曲

四首

芙蓉如繡柳如織浣紗渡頭日將匿高髻雙珠玳瑁簪

采蓮一曲傾江南

珠履錯落華燈光長袖宛宛屬羽觴含笑一轉心相知
誰能不前復自持

黃金匝匝葳蕤鑰北斗闌干城上落美人空牀夜不眠
雙雙玉筍下燈前

江南女兒蹋蹀歌陽春窈窕出綺羅黃金轡頭紫騮馬
長安少年事遊冶

估客樂 二首

估客從揚州大船載何來有無郎寄書但語莫徘徊
估客廣州人出入三江口一船載三千娘但日沽酒

莫愁樂 四首

何來諸少年石城迎莫愁莫愁石城西門前江水流
莫愁善西曲曲曲變新聲含意嬌不發春風感人情
莫愁幽閨性非但傾城色石城諸少年人人自相識
何處尋莫愁石城諸少年可憐六萌車不送莫愁還

襄陽樂 六首

朝上大隄頭暮上大堤頭大堤諸女兒遊冶不知愁
女蘿復可縫兔絲復可織唯有菖蒲花郎自不曾識
大堤諸女兒歌舞日相逐郎今定憐誰夙昔誰家宿
郎君但坐飲聽我白雪絃十三工西曲自不工數錢
揚州大估客千金作一裝誰敢攀貴德牽壞儂衣裳
詫儂斷信使還書亦不作微薄自憐儂歡豈自微薄

三洲歌 三首

何處估客豪揚州估客豪象牙持作檣鋤石持作篙

聞歡揚州去大偏居上頭一載五百萬兩載千萬餘
何來板橋灣持底喚沽酒兩叢蒲鍛鑲問儂取不取

襄陽蹋銅蹄

四首

白馬蹋銅蹄着地銅蹄鳴往來大堤上出入襄陽城
大馬珂戩頭一步三春鉏借問馬上兒家在襄陽不
白馬金絡頭一步三駮駟便是馬上郎何嘗不婀娜
陽春二三月襄陽好徘徊淶酒漢江色與郎傳一杯

青驄白馬

青驄躑躑八尺強黃金絡頭絲作韉
可憐白馬如人長著地徘徊自生光
青驄白馬治遊郎勞君下都看三陽
可憐白馬逐青驄石橋柏梁五湖東
青驄白馬六萌車可憐今夜宿誰家
借問窈窕西曲娘白馬青驄去無常
借問窈窕西曲女石城莫愁憑寄語
齊唱可憐淚沾裳可憐三聲忘故鄉

夜度娘

儂來星始集儂去月將夕
不是地上霜無人見儂跡

長松標

落落南山松長標一何拙
上棲萬里風下覆千年雪

雙行纏

朱絲蕤蕤繩是儂雙行纏
繞腕結同心傍人那得見

黃督

誰能見歌舞不自愛陽春
少年雙淚落知是他鄉人

作蠶絲 二首

拾蠶蠶如指出桑桑如掌一日三箔眠交儂那得往
大繭大如卵小繭垂其腴三秋上織作君看羅繡襦

碣石篇 四首

碣石中怒滄海北倚元氣吐欲若偃若起長風相薄跳
波千里懸流冒顛天漢外紀地軸高標轂轉白日與齊
俱入與汨偕出

其二

涼秋九月塞外草衰白日蕭條北風苦悲邊聲四起胡
馬成羣爍火如星列障如雲錢鏐既置修我戈矛裹糧
坐甲唯敵是求

其三

委蛇者河千里一曲方之舟之匪帛伊粟太行詰屈西
北是經車轍馬迹日不遑寧於鑠聖人依其在京差次
吏功郡國以成

其四

羽翼未就鴻鵠徘徊神龍失水螻蟻所裁珠不暗投劍
不倒持能弗用利勿處於疑高才者妬匪但在人逃名
避世以保其身

白紵舞歌

四首

華鐙參差月舒光笛簫笙琴瑟張館娃窈窕夜未央
西施起舞屬吳王白紵颯沓零繁霜浮雲綽約凝且翔
將絕復引歌為長迴身急入促管藏揚跼摩趺匝洞房
流風徘徊生繡裳答桴應節蹈鼓行挺釵欲墮復不遑

羅袖繚繞滿中堂與志變化無恒常諸工競寫忽已忘
遷延就次進羽觴

其二

二八齊容羅象筵激楚之結獨秀先白紵蕭索陽春前
迴風飛雪相流連玉腕繚繞縈繁絃朱唇宛轉含蹁躑
將行復却私自憐願君蹋歌及盛年

其三

春日荏苒花落英吳姬起舞媚前楹迴身頓趾迅且輕

纖塵暗暖不及生投袂一轉激楚成徘徊復進為新聲
二八歛手停鳴箏中曲再變豪竹驚如矜若怨意未明
餘姿逸態猶縱橫妙技絕世色傾城誰能顧盼感人情

其四

雙袖徐起若有思逸態一放橫難持淫衍詰屈紛陸離
流紈曳縠風委迤縈塵逗節利屣施紆形赴曲影不知
纖腰欲結行綴移衆變杳至生繁姿躊躇中止人盡疑
浮騰絕跡稱神竒遊精蕩志君自治大樂萬歲遠如期

霹靂引

平成天地剖九州羅列五嶽江河流明堂受計朝諸侯
人馬辟易氣縱橫悲歌慷慨志不平

天馬引

胡風雨駢駢而空山有人

躑躅兮悲鳴匝余室兮三行

蜨蝶行

蜨蝶翻翻戲遊來東園苜蓿中不知誰家涎涎乳子燕

銜之我入窈窕紫深宮紫深宮構櫺間高坐頗頷待哺
兩黃口睨之阿母得食還搖頭鼓翼誰忍視蜨蝶輕薄
亦可憐

悲歌

慷慨乃知故人徘徊乃知故鄉遠道多懷久客自傷欲
駕車無輓欲渡河無梁中夜顧形影泣下沾衣裳

猛虎行

饑且從漂母食寒且從巢父棲石不為周客笑玉不為

楚王啼管茅但塞路桃李自成蹊

枯魚過河泣

大魚啗小魚小魚啗鰕鰕啗鰕鰕啗沮洳
多沮洳請

君肆中居

遠遊篇

萬里未足步過謁歷遐荒一舉駕黃鵠再舉凌雲翔澄
氛隱北斗河漢集為梁山川自紆曲天地自圜方六鰲
抃蓬萊十日彈扶桑潮水怒相擊崑崙出中央流覽臨

九州衆人何茫茫
網緼造元氣
控揣成陰陽
黔羸秉大鈞
叢脞不可當
道逢王子喬
揖我還故鄉

廣齊謳行

不勞歌楚艷
請為罷吳趨
上客但安坐
聽我奏齊謳
鷹揚表東土
賜履維青州
沃壤既如膏
絲枲鞠且柔
魚鹽無儉歲
海王自春秋
百二敵殪秦
八九吞徒州
美哉一匡力
天下咸宗周
朝服西濟河
鞭箠使諸侯
至今臨淄途
誦義慕前修
枹鼓立軍門
意氣縱橫浮
舉袂成幃幙

攘臂赴仇讎先君務養士奕世恢鴻猷晏嬰以當路結
交魯孔丘其人聘列國終日無停輶及聞箛韶音若與
唐虞遊三月忘寢食栖栖此淹留季札本荆蠻華夏多
夷猶泱泱歎大風觀采不能休五伯桓稱首四豪文其
尤擁篲為賓師鐵籠存主憂闊達有遺俗功利非所謀
馳騁一何雄冠劍常相求蠲辭萬家邑連謝千金酬即
論二布衣豈復商賈流

前緩聲行

海中之山必有天上之河人知其一莫知其它自非意
氣輕黃金結交寧足多當復思東來之兔必有西去之
烏不舍晝夜曾何愛於吾徒長笛不呼短笛呼願君有
酒即飲無酒酤

結客少年場

翩翩白馬客遊冶長安城自矜有俠骨骯髒多交情羞
倚將軍勢詎借傍人名利劍一在掌四海皆弟兄片言
出肝膽杯酒如平生恩讐等白日然諾千金輕君看少

年場意氣誰縱橫
罵坐亦已麤探丸
非老成淺之為丈夫
賢豪大所營
長兄推魯連
仲兄推虞卿
小弟處囊中
黽勉荆楚行
但令稱國士
不必取先鳴

東飛伯勞歌

東飛伯勞西飛鵲
黃金倉琅蕤
鑰誰家女兒倚高樓
含嬌吐怨彈箜篌
明珠翠羽紅粉妝
單衫婀娜春風香
女兒年幾十五餘
開顏發艷玉不如
箜篌宛轉作新聲
可憐一曲傾人城

樂府

羣胡歎朝那請與漢家和紫貂黃羊白橐駝單于闐氏
乘六羸

河中之水歌

河中之水流迢迢洛陽女兒名嬌嬈嬌嬈十三稱絕色
十四懷春未可挑纔梳墮髻即殊衆怕逐時人鬪小腰
學成織錦機猶澁解度新聲瑟嬾調日出采桑城東路
路傍桃李花飄姚左手提籠絲作繫右手攀花折其條

國卿下裝不復顧使君五馬徒相邀董家高樓一百尺
歸來誰見倚逍遙

三言

郡齋同元美賦得陰字

漳之潯大陸陰天落落日駸駸誰為郡此滯淫君在坐
倍蕭森嗟波及邈陸沈酌我酒聽長吟秋無色風雨深
山欲出薜蘿侵淚相視卧獨臨滄海夢白雲心來何處
別至今重握手一知音孤城夜楓樹林漂短髮問抽簪

四言

效阮公

二首

太清孔陽元氣絪縕靈曜懸鑒列宿垂文威鳳振羽神
龍作鱗蕙蘭幽鬱松桂輪囷

其二

日照月臨天高氣清金支秀華羽林翠旌六駕龍秋四
牡鸞鳴濯纓雲漢晞髮增城

滄溟集卷二